



Tir Yimyim

www.tiryimyim.in

Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : [f](#) Tir Yimyim

[tiryimyim@aolima](#)

[tir yimyim](#)

TAPAK 7

Omar Abdullah-i Karnataka
nung Congress sorkar aitsü

Taoba Pak PM Imran Khan ano
ken o danga nung apu



VOL. XXI NO. 38 (ADOK 38) DIMAPUR RASEMNÜ (WEDNESDAY)

YIMPOKSÜI (NOVEMBER) 15, 2023 ₹ 5.00

Assam Rifles-i Myanmar Army 43 meyipa yok

Arrla 371(A) kümzüka ayutsüla: TR Zeliang

Aizawl, November 14, 2023 yimtsüngi anir ao.

(Agencies): Myanmar Army aser CNA/CDF raraba sülen Myanmar sepai 43-i Mizoram Police ket nung bendanga agüja liasü aser tanü Assam Rifles-i parnok meyipa yokogo.

Myanmar nung khatepba ajanga Hombar nikongdang Myanmar Army 39 aser tanep ano sepi 4-i Mizoram Police ket nung bendanga agütsü. Parnok ajak Zokhawthar Police Station nung aya aser iba sülen Hnahlan

Home Ministry-i tuyuba ama Myamnar sepaitem Assam Rifles ket nung agütsü aser Champhai District kübok Hnahlan yimtsüngi anir aoba sülen Indian Air Force helicopter ajanga Myanmar-i yok.

Tanü nikongdang 1:00 ako nung Myanmar sepai 42 parnok linüki meyipa yok aser sepi ka Champhai District Hospital nung anepaladar.

Azü agi angoba tepo zübo shia Rs 10,000 agütsütsü

Chandigarh, November 13, 2023 (Agencies): Yimdong nung aliba azü agi angurtem tepo zübo shia tajemba agia Rs 10,000 teyari angutsü ta Punjab and Haryana High Court-i Mongulbarnü metedaktsüogo.

Ibala ken o asoshi senotsü teyari agütsütsübaji sorkar tebilemtsü asütsü ta parnoki ashi.

Punjab and Haryana High Court nung petitions 193 angadangdang azü agi anguba atema tepo ka zübo (per teeth mark) shia Rs 10,000 aser zübo 0.2 cm shia Rs 20,000 agütsütsü ta obendang agütsü.

High Court-isa Punjab, Haryana aser Union Territory of Chandigarh dang pei pei district nung deputy commissioner temi anir iba teyari agütsütsü atema committee tentettsü tetuyuba agütsü.

Küm ishika tsüngda India nung talidak maliba azütemi (stray dogs) nisung dak angoba tatalokba aika atalokogo.

Wagh Bakri Tea Group nung

India nung kidang metsüba (pet) azü crore 1 tema lir aser stray dog crore 3.5 shi lir ta osang bushiteta lir.

2019 küm nisung 4,146 dak azü agi angoba sülen asü. 2019 nungi tenzüker India nung nisung crore 1.5 dak azü agi angoba osang lir ta National Crime Records Bureau ajanga metedaktsüogo.

Uttar Pradesh nung stray dogs teimba lir aser iba state nung 2019 nungi tang tashi nung azü angoba tatalokba lakh 27.52 atalokogo. Azü agi angoba tatalokbaji Tamil Nadu nunga lakh 20.7 aser Maharashtra nung lakh 15.75 lakh liasü.

KPC aser DPC nati asür Aneile Kenye mangyimer

Dimapur, November 14, 2023 nükshia repranger. Lar (TYO): Kohima Press Club (KPC) aser Dimapur Press Club (DPC)-i sangdong balala ajanga Aneile Kenye asüba osang angashia temulung raksaba aser mangyimba metedaktsüogo.

Asür Aneile ya senior journalist aser KPC Advisory Board züngsem Oken Jeet Sandham kinungtsü lir.

Dimapur Press Club (DPC)-ia senior journalist aser Kohima Press Club (KPC) Advisory Board züngsem Oken Jeet Sandham kinungtsü Aneile Kenye asüba mangyimba metedaktsüogo.

Iba ama temulung raksaba mapang ka nung DPC-i Sandham aser par kibong den mangyimba osang lemsateper ta DPC sangdong ka nung metedaktsü.

La ya tasütait nisung ka liasü aser ano lar kinungertem la küm aika anepalua aruba kanga



Dimapur, November 14, 2023

(TYO): "Indian Constitution nung Arrla 371-A kümzüka ayutsüla" ta Nagaland deputy chief minister TR Zeliang-i ashi.

Zunheboto district nung Ahuna benjungmong nung o jembidang TR Zeliang-i iba ya nenshia metedaktsü.

"Arrla 371-A kümzüka ayutsüla saka iba ajanga terenlok maparen nung tetsükdaktsü magütsütsü" ta pai ashi.

Naga nunger benjungbentsü yimya aser inyaksangshi khenyongi balaka lir aser item ajanga lokti longjemtsü lenmang lir ta TR Zeliang-i ashi.

Naga kintem shia pei pei benjungtem lir aser küm nung ita balala amonger. Asen sobaliba aser inyaksangshi tajungtem wazüka ayutsüla aser lanuputu dang sayutsüla, ta pai ayongzük.

Zunheboto ya nokinketer lima ta züngshir aser Nagaland renlokba nung shilem tulu agir

wadang balala nung inyakertem

sotetdak lir ta TR Zeliang-i ashi.

Zunheboto district ya kanga dang tongtipang tesem ka nung amenoka lir aser Nagaland kübok district 7 den arrtsütepa lir. Zunheboto ya tanga district tem asoshi centre ka asütsü, ta paisa ashi.

"National Highways asoshi Minister in-charge ka ama ni land compensation issue koktettsü atema nükjidong lir kechiyong iba ajanga mapatong aika nung tetsükdaktsü ajurur" ta Zeliang-i ashi.

Works and Housing department ketcangsürtem den

külemi pai land compensation atema inyaka arur ta paisa shisem.

October 30 nü Guwahati nung Road, Transport and Highways Union Minister Nitin Gadkari den senden amendang Centre-i Nagaland nung ali dang ngura national highways

yanglutsü renema aliba shiogo ta Deputy CM TR Zeliang-isa metedaktsü.

"Senotsü peria maliba ajanga state sorkari dangbo gari lenmang tajung meyanglutetsü. Iba onük atema village council temi bangzung tajung ka renemtsüla" ta paisa ashi.

Zunheboto district küm 50 ajungba benjung amongdang nübertemi tesüiba meyipa reprangshitsü aser tarutsü atema renemtsü ayongzüker. Asenok külemi merangra Nagaland ya India nung tanga state tem den kasa kümetsü, ta TR Zeliang-isa ashi.

"Asenoki Arrla 371(A) kümzüka ayutsüla saka Constitution ajanga asenok nem temeten agüja aliba ajanga terenlok maparen nung tetsükdaktsü maludaktsütsü" ta paisa ashi.

Iba sentong nung alakteta jaoker AH & VS Advisor Kazheto Kinimi-ia lanurtem dang kin benjungtem asoshi temulung agütsütsü aser sobaliba o inyaksangshi wazüka ayutsü ayongzük.

Sentong nung Eastern Nagaland people Organisation (ENPO) president Tsapiku Sangtam, Tenyimia Union Nagaland President Kekhwengulo Lea aser Central Nagaland tribes Councils (CNTC) president Khondao Ngully nungeri benjung salem osang lemsatep.

CoTU-i mapang telatet makai NH-2 aser NH-37 mokdangtsü

Kangpokpi, November 14, 2023 (TYO): Committee on Tribal Unity (CoTU) Sadar Hills Kangpokpi-i November 15

ayaterm nungi National Highway 2 aser National Highway 37 nung mapang telatet makai rongsenketzung mokdangtsü lemtego.

Mongulbarnü Kangpokpi district kübok Gamgiphai nung Kuki-Zo tsürtemia Gamgiphai nung Kuki-Zo nunger Lhunkhosei Chongloi aser Satgougin Hangshing na chiokang ta takhangba agüja mener lungkak ait.

Kanglatongbi nung Arambai Tenggol nunger ana apu ta tena dak taila tai tonglokja aputa tetsürtemi ashi.

"Tena ya kubo tanubo Dimapur nung temang

anapalutsü atema meina orr Kangpokpi-i meyipa arudang apu" ta Lhunkhosei Chongloi teyi

tantsüla ashi.

State sorkari Kuki-Zo nunger dakbo mapa inyaker saka Meitei nungeri Kuki-Zo nunger kibong ka nung nisung pezü tepsetba atemabo kecha meinyaker ta laisa ashi.

Ozung amertemi Kuki-Zo nunger aliba tesemtem nung law and order maparen shitak meinyaker aser onoki akhangba magizüker. Anungji onoki November 15 ayaterm nungi mapang telatet makai National Highway-2 aser NH-37 mokdangtsü. Tai maketba Kuki-Zo nunger ana chioktsüla ta CoTU-i tanü metedaktsü.

India-Myanmar arrtsülen Chin National Army-i Rihkhawdar jila atsünga agiogo

Aizawl, November 14, 2023

(Agencies): Myanmar nung Chin National Army (CNA) ajanga India-Myanmar arrtsü anasa aliba Rihkhawdar jila atsünga agiogo.

Chin state kübok Falam township nung CNA-i Rihkhawdar jila ajunga atsünga agir parnok indang wako atsüketogo.

November 13 nü Indo-

Myanmar arrtsü anasa khateptsü tenzükba sülen Chin National Army aser parnok den yaritepertemi Myanmar sepai aser security forces aika pua lir aser Myanmar sepai aika tepsetogo.

Iba lendong nung yirur aika Mizoram kübok Champhai District Hospital-i anir arua anepaladar aser civilian ka

Zokhawthar nungi mozü kidangi anir aodang len tom nung asü.

Myanmar nung People's Defense Forces ajanga Myanmar Army tesep ama makdok. Myanmar Army-i jet fighters aser helicopters amshia raraka PDF-i Mizoram arrtsülen Myanmar army tesep ana makdok ta osang angazüker.

Dimapur Self Help Group Expo 2023 tenzükogo



Hotel Saramati, Dimapur nung Minister, Rural Development and State Institute of Rural Development, Metsubo Jamir-i shelf ka semzüktsüba mapang tangokba noksa nung angur.

Dimapur, Yimpoksüi/Nov. 14 (TYO): Minister, Rural Development and State Institute of Rural Development, Metsubo Jamir-i Mongulbarnü Naga Shopping Arcade (Supermarket) nung Dimapur Self Help Group Expo 2023 semzükja liasü.

Anogo ana Expo ya District Rural Department Agency, Nagaland State Rural Livelihood Mission (NSRLM), District Mission Management Unit (DMMU) Dimapur ajanga ayongzük, kong block balala nungi SHGs 12 shimteta parnoki yangluba osettsüset sayur.

Iba sentong nung jembidang Minister Metsubo Jamir-i ashiba agi, state nung nüburtem aser rongsenketzung aintsu asoshi SHGs temi tongtipang shilem agitetsü.

Tanü state nung SHGs ajanga tajangzük tajung ka angubaji iba

yagi tetsürtem pei sasa pei peria alitsü asoshi yarir aser tarutsü jenjang tajungba kumdkaktsütsü asoshi tasü ita nokdaker, ta pai ashi.

Rongsen agi peria meliaka loktiliba aser rongsenketzung ainba nung tongti shilem agiba asoshi pai tetsürtem nem tenüngsang agütsü.

Yimdak-yimtsüng nung aliba tetsürtemi yanglutetba osettsüset ayoktsü asoshi online sapang ka yangluba ajanga yimdak-yimtsüng nung aliba tetsürtemi ajuruba timtem aika kokettüsü, ta Minister Metsubo-i ashi.

Item sapang yagi yimdak-yimtsüng nung aliba tetsürtem national aser international markets den sendakteptsü aser pei yanglutetba oset sayutsü maongka agütsütsü, ta ashi.

Market tesendaktep ya kanga tongtipang lir aser iba

lenmang ya bushitetsüla aser amenoka aliba bisonesses aser e-commerce tulu den lungjemer inyakba ajanga item tetsürtem jenjang tajungba akumtsü, ta pai ashi.

Iba sülen Minister Metsubo-i Hotel Saramati, Dimapur nung local products tem sayutsü asoshi shelf ya semzikja liasü.

SHGs tem nem pei sasa yanglutetba osettsüset sayutsü aser yoka state rongsenketzung tajungba kumdkaktsütsü nükjidong nung iba sentong ya ayongzüker, ta Project Director, DRDA, Dimapur, Moa Sangtam-i ashi.

Local products tem sayutsü asoshi Hotel Saramati, The Garden, Tourist Lodge aser Christian Institute of Health Sciences and Research (CIHSR) nung shelves ka-ka yua lir, ta pai ashi.

Dimapur nung workshop ka ayungzük

Dimapur, Yimpoksüi/Nov. 14 (TYO): Empowering Women for Entrepreneurial Excellence "SheRises" workshop ka Deputy Commissioner, Dimapur indang Conference Hall nung November 14, 2023 nü agüja liasü.

Iba sentong nung EAC Dimapur, Litsenthung Kikon-i ashiba agi, nübur tenzüktsü asoshi tetsür nem maongka kasa agütsür aser tetsür entrepreneurs temi takok ngua wadang balala nung terenlok lir. Entrepreneurship nung tetsür asoshi teimla jenti lir aser tarutsü nung lenla ajaklen takok angutsü imlar, ta pai ashi.

Iba sentong ya Dimapur District Administration, Dimapur District Skill Committee ajanga WENN den lungjemer ayongzük.

NDPP Women Organisation, Mokokchung Region pur Asüngsa-shiba Shisatokden den külemi Küm Tatem Inti Senden sentong aka

NATIONALIST DEMOCRATIC PROGRESSIVE PARTY
Women Organisation
Mokokchung Region

ANNUAL GENERAL MEETING CUM SEMINAR
Theme : "Role of Women in Politics"

Resource Person : SHRI R. DEN LONGKUMER
Vice President NDPP Central, Nagaland

: 14th Nov. 23

Venu : Mokokchung Region Office

NDPP Women Organisation, Mokokchung Region pur Asüngsa-shiba Shisatokden nung Shisalen Tuyur Senior Vice President, NDPP, Nagaland Wb.R.Lepden Longkumer-i jembidang tangokba noksa

Mokokchung, November/ Yimpoksüi 07 (TYO): Nationalist Democratic Progressive Party (NDPP) Women Organisation, Mokokchung Region pur tanu Asüngashiba Shisatokden den külemi Küm Tatem Inti Senden NDPP Mokokchung Region Office nung kanga dang takok ngua agiogo.

Tanu iba Asüngashiba Shisatokden nung Shisalen Tuyur

Senior Vice President, NDPP, Nagaland Wb.R.Lepden Longkumer-i jembidang Aorji Longtrot nung apokta jembir aser Aor Longtrot nung apokdang tetsür asem aser tebur asem apok aser yamaji Aor sobaliba tenzüktdang yongi tetsür dena liasü. Aor Longtrot nung poker Chungliyimi aser Aonglenden nung lia arudang tetsür yimsüuba maliasü, Ao kin

yimsüuba nung tetsür magii aruta pai ashi.

Tsüngremi nisung yangluba mapang nunga tebur yanglur kelen teyarir tajung ka nungtakerta reprangteta tetsürji yanglu, anungji tetsürji kilir ka ama masü saka teyarir tajung ka lir, anungji tetsürtemi ajema meobilemi tekong songteta tasü ita kechisarena ajak nung tongti shilem agitsülate adenshia aliba NDPP Women Wing züngsempurtem Wb.R.Lepden Longkumer-isa ajungshia ashi.

Asen lima nung tetsür nem temeden magutsütsüta jembir, saka tanu putu nung tetsür metendaktsüra alima mantsü, alima otsüji reprangdangra tetsüri sarasadema ajanga alima rara nunga takok anguba lir, anungji tetsürji alima asoshi kangasa tongtipangta paisa shisem.

Wb.R.Lepden Longkumer-isa tetsür aden nungdang lokti, yimden aser arogo tejakleni aotsüta alimai metetyong tanu jokola tetsür nem Rev. agütsür, deacon inyakdaktsür aser tangbo Nagaland nunga joko MLA 2 tashi anioka

Tanü AHoDs aser HoDs senden amentsü

Dimapur, Yimpoksüi/Nov. 14 (TYO): Administrative Heads of Departments (AHoDs) aser Heads of Departments (HoDs) senden November 15, 2023 nikongdang 2:00 ako nungi tenzüka Secretariat Conference Hall, Kohima nung amentsü.

Iba senden nung Statehood Day asoshi renemshiba, e-office, Hornbill Festival 2023 atema renemshiba aser mapa alemba (Tourism Department), Centrally

Sponsored Scheme mapa kuma inyakba - achayangba, mapang shidak nung UCs agütsüba, junga inyakba indang onüktem jembitsü.

Kasa senden nung Updating of Departmental website (IT&C Department) indanga jembitsü, anungji AHoDs aser HoDs ajak iba senden nung medema arua adentsü metedaktsür, ta sangdong ka ajanga ashi.

Committee on Subordinate Legislation senden ayonger
Dimapur, Yimpoksüi/Nov. 14 (TYO): Committee on Subordinate Legislation, Nagaland Legislative Assembly senden November 20, 2023 anüngdang 12:00 ako nungi tenzüka Assembly Secretariat Room nung

amentsü, ta MLA aser iba committee indang Chairman, Dr. Sukhato A. Sema-i sangdong ka ajanga ashi.

Iba Committee züngsem ajak senden nung medema arua adentsü ayongzüker, ta sangdong ajangasa ashi.

Kohima Police-i heroin gram 1073 apu



Dimapur, Yimpoksüi/Nov. 14 (TYO): SDPO (North) lenisüba kübok North PS (Kohima) police temi November 13, 2023 nü Sechu (Zubza) anasa NH 29 nung Manipur nungi adokba Maruti Swift gari ka (Regd. No. NL 01C A 4396) soita iba gari meita bushiba

mapang sapon cases 90 nung heroin südi ta temolung melemteti aliba oset gram 1073 ngutet, ta Kohima Police sangdong ka ajanga ashi.

Iba dak sendakba nung gari nung mena aliba nisung ana pua ken o bushisüngdangba mapang lir, ta sangdong ajanga ashi.

tajungshi o tatsütsü jembi aser tarur pela agizükba aser tepele o NDPP Mokokchung Region Women Organisation President Wt. Arenla Pongan aser Wt. Margaret tenati jembiba den sentong nung Tsüngrem lenisüba jazüka NDPP Mokokchung Region Women Organisation Secretary Wt. Kilenremlai sarasadem aser NDPP Mokokchung Region Women Organisation General Secretary(Admn). Wt. Tiasangla ketcangsüba nung iba sentong agia liasü.

Iba shisatokden sentong temer kelen Nationalist Democratic Progressive Party (NDPP) Women Organisation, Mokokchung Region kübok aliba Assembly Constituency-tem 22 Arkakong AC, 23 Impur AC, 24 Angetyongpang AC, 25 Mongoya AC, 26 Aonglenden AC, 27 Mokokchung Town AC aser 29 Jangpetkong AC nungi arur ajak külemi mensem ka mena NDPP Women Organisation, Mokokchung Region tashi ita aotsü asoshi shisalemsatepba mapang tajung ka agia liasü.

Kasa sentong nung NDPP Mokokchung Region President Wb. Mangyangnungba aser NDPP Mokokchung Region Women Organisation Vice President Wt. Senlemtola tenatia

Omar Abdullah-i Karnataka nung Congress sorkar aitsü

Baramulla, Yimpoksüi/ November 14 (Agencies): State exam authority-i taruba recruitment tatiwang mapang tekolak nembung asema sūoshitem kecha masemtsü atema tenokdangba agütsüba atema National Conference vice president Omar Abdullah-i Karnataka nung Congress sorkar aitsüogo aser ashiba agi iba ya Muslim nunger dak rangloker agiba jenjang ka lir.

Pai ashiba agi, iba tetuyuba agütsüba ya tezüdangtsüka, kechiyong BJP-i masü saka Congress-i iba tetuyuba agütsüogo.

"Iba tetuyuba agütsüba ya tezüdangtsüka. Nisungtem sobosolemtsü nung sorkari kechiba jushir? Iba tetuyuba ya Muslim nunger dak rangloker agütsüba lir. Taoba mapang Karnataka nung iba amala tetuyuba agütsüba mapang mesüngmangi liasü, kechiyong iba mapang BJP-i yimsüüba liasü. Congress-i yimsüüba

mapang iba tetuyuba agütsüba ya tezüdangtsüka. Ni lenir tejen Mallikarjun Kharge, Sonia Gandhi aser Rahul Gandhi nunger dang iba tetuyuba agütsüba ya bilemdangshitsü asoshi mepeshitsü," ta pai ANI dang ashı.

Karnataka Examination Authority-i Mongolbarnü, state nung board aser corporation balala indang taruba recruitment tatiwangtem agiba mapang

tatiwangtem agiba takdangtem nung tekolak nembung asema sobotsü kecha masemtsü tenokdangba agütsüogo. EA-isa electronic gadget kecha bener maitsü tenokdangba agütsüogo.

Omar Abdullah-i aniba party ya INDIA alliance nung densema lir. INDIA ya BJP anema party 28-i tentetba alliance ka lir.

November 6 nü Karnataka Public Service Commission tatiwang agütsüba tetsür ka dang tatiwang agiba takdangmai tsüngda la indang mangalsutra

agütsü asüngdanga liasü. Iba tatalokba sülen Hindutva activists temi longkak ait tenzük aser ketdangsürtemi tatiwang agiba takdangtemi kiyimdang amshiba temeshi angüsü aser tetsüng temeyong nung anoba kuri asemtsü asoshi temelaba agüja liasü.

Recruitment tatiwang ya state nung November 18 aser 19 nü agütsü.

Kaketshirtemi Bluetooth device tem amshiba indang tashishiba angazükba sülen state sorkari tekola nembung asema sūoshitem kecha magidakstsü asoshi telemeteba agia liasü.

Karnataka nung 2022 küm January ita nungi educational institutions tem nung Hijab asema ya yimden yimsüüba tsütsü ken o tulu ka kümogo. Udupi nung Government PU College ketdangsürtemi hijab semer aliba tetsür trok institution-i midakstsü sülen mepetmesü tulu adoka liasü.

PM Modi-i Jharkhand nung 15buba PM-KISAN agütsütsü

New Delhi, Yimpoksüi/ November 14 (Agencies): Ato Kilonser Narendra Modi-i Bodhbarnü Jharkhand kübok Khumti nung PM-KISAN 15buba installment agütsütsü, ta official sangdong ka ajanga Mongolbarnü metedakstsü.

Sentong nung PM-i direct benefit transfer mode ajanga temsüa aliba aluyimer million 80 nem sen crore 18,000 shi lemtsütsü.

Installment 14buba nung aluyimer million 80.5 shi-i sen crore 17,000 parnok indang bank account tem nung agizükogo, koba Modi-i July ita agüja liasü.

PM-KISAN kübok sorkari inyakyim tapet kübok züngoksema aliba aluyimertem nem küm nung sen 6000 agütsür. Sen ya asemen tashi lemdanger meyirejang anana agütsür. Iba scheme ya 2019 küm February ita 24 nü amenoka liasü aser iba sorkar mapa lir.

PM-KISAN scheme kübok

installment 11 aser 12buba 2022 küm May aser October ita agütsüogo. Iba scheme ajanga aluyimer tetsür million 30 dak tema ajangzükogo, shirnoki crore 53,600 shi agizükogo, ta sorkari ashı.

Iba scheme amenokba sülen sorkari temsüa aliba aluyimertem nem sen lakh crore 2.42 dak tema agütsüogo. PM-KISAN ya central sector scheme ka lir aser iba atema noklang nung noklang centre-i senotsü agütsür.

Scheme guidelines dak ajemdaiker beneficiaries tem maitsü jangjatsüba ya state sorkar mapa lir.

Doctor tem tetuyuba nung Sonia Gandhi Jaipur-i ogo

New Delhi, Yimpoksüi/ November 14 (Agencies): Moziuki nungi adokba sülen ita ana lir taoba Congress tir Sonia Gandhi, Delhi nung mopung jenjang tajungba makium aonung Jaipur nung alitsü atema anirogo.

Gandhi shiba tang assembly election agütsü aliba state balala nung nüboyimba sentong tem nung shilem agia senzüdar, pai Ms Gandhi ya Mongolbar aonung Jaipur nung alitsü ajuruogo.

Sonia ya temang maneni akumba sülen September ita Delhi kübok Sir Ganga Ram Hospital-i anir ao, ajisüaka anogo ka lir yokatok. Maneni la January ita-a tangola sashitsü mesademi akumba sülen mozükidangi anir oa liasü.

Sonia ya tangula sadema mesashitetba agi kangshia arudar aser doctor temi mopung jenjang tajungba aliba tesem kati khen atema oa alitsü asoshi tetuyuba agütsüogo.

Mongolbarnü Delhi nung Air Quality Index 375 liasü, koba 'severe' category-i aiter aser kasa mapang nung Jaipur indang Air Quality Index bo 72 liasü, koba 'moderate' category-i aiter, ta private air quality monitoring website aqi.in-i ashi.

Congress lenir Rahul

Taoba Congress tir ya Delhi nung mopung ka menena akumba ajanga tanga yimti kati aotsüsa akumba ya tang mezüngbuba masü. 2020 kümä asükwa mapang doctor temi tetuyuba agütsüba sülen la Goa-i oa liasü.

Modi aser Shan nati sorkar auya; Congress MLA tem ali: Rahul

Vidisha, Yimpoksüi/ November 14 (Agencies): Congress party-i menden 114 koka parnok largest party liasü, aser independent tem teyari nung parnoki sorkar kümpta liasü.

Ajisüaka Kamal Nath chief minister kümter ita 15 dang lir MLA tem resign asüba ajanga sorkar chirepa liasü. Iba sülen BJP (menden 109) puri Shivraj Singh Chouhan lenisüba nung sorkar kümpta liasü.

2020 küm MLA 22-i party anema nokdaka Kamal Nath-i aniba sorkar chirepa indang jembiba mapang Gandhi-i ashiba agi, nürburtem ola BJP puri temseptsüogo.

"Küm pongu tejakdang nenok ajaki sorkar kümpterli atema Congress party shim. Nenoki BJP masü saka Congress party shim.

(Maneni tapak 8 nung)

'Janjatiya Gaurav Diwas' temaotsü manung amungtsü nenok ajak den lemsateper.

Iba anogomung mapang

Janjatiya Gaurav Diwas

Tribes India ya nenok shishilembadak kümdukjang

& get upto 40% Discount

Narendra Modi, Prime Minister

Blgawan Birsa Munda 1875 - 1900

Narendra Modi, Prime Minister

Tribal Textiles | Tribal Jewellery | Tribal Paintings | Metal Crafts | Pottery | Cane & Bamboo | Gifts & Novelties | Organic Food Products

Narendra Modi, Prime Minister

Visit tribesindia.com or Tribes India Showrooms across India

To locate nearby showroom visit <https://trifed.tribal.gov.in/retail-outlets-list>

Connect with us @tribesindia

*T & C Apply



TIR YIMYIM

YIMOBILEM (EDITORIAL)

DIMAPUR RASEMNÜ, YIMPOKSÜ (YIMPOKSÜ) 15, 2023

Asayadak ki yanglutsür

Nagaland nung Neiphiu Rio chief minister-i aniba government arur külen saisapong, kentenmenü aser benjombentsü nung kanga temulung agüja inyakba angur. Iba tejangraba aser tangatetba nung tang khen nung asayadak ki, multidisciplinary indoor stadiums pungo tashi kenüyongi semzüktsübaji state asoshi takok tuluka lir aser saisapong jangrartem asoshi osang tajung ka asütsü. Item indoor stadium-temji Chümoukedima, Niuland, Tseminyu, Tuensang aser Noklak nung liasü aser ano trokbuba indoor stadium ka Shamator nung hopta ishika tsüngda renemtsüba lir ta angazükogo. Ano, kasa indoor stadium ter tesem balala nung yanglutsü Chief minister sentong lir. Iba asayadak ki ya 2021-2022 küm "Special Assistance and Innovative Program" kübok ki shia sen crore 3.5 endoka yanglutsü asoshi latetba mapa ka takok ngua inyaker asütsü. Atangji, asayadak ki yanglubaji "Innovative Program" bo masütsüa akok aser kijia sen crore 3.5 jenjangji shitak yanglu asü meyangluar, ajibo teinyaker aser teyanglurtemi dang metettsü, ajisüaka asayadak ki yanglubaji menüngdakba mapa kabo masü, anungji ki yanglu langa asayar tajung aika adoktsüa tang nungi ano saisapong nung tali temulung agüja inyaktsübaji government nung saisapong ketdangsertem khuret asütsü. Aji oda, asayadak ki aser tesem tajung yanglua toktsuyonga ketangsertemi kiji junga anepalu mesüra aser asaya sayurtemi bendanga agüja mesayutetra aser sayuyonga tangazükertemi temulungtetba tulu nung shitak angazüka masayatetra asayadak ki yangluba nükjidongji matongtsü. Iba tangatetba nung state government asoshia ki yanglutsübaji tetenzük ser iba kidang nung jagi asayartem tajung adoktsüa kiojen anepaluba den asayartem nüngdak ajak shitak agüja anepalutettsü imlar. Naga nungertem aika dak Tsüngremi agütsüba kentenmenü aser saisapong sempet keta lir, anungji item nungji jangrar aser shingaia mesayuyonga peisasa pei sempettemji junga amshitetba nisung aika angur. Anungji, tang amai asayadak ki aser moapu tajung yanglutsür tesayur tajungi sayu nungbo tanga asaya nung tangar koka masayatetyonga table tennis, badminton aser tsüngtepba ama asaya nungbo Naga nungertem tangar koka asayatettsü. Atangji, ball asayaba asaya nunga Naga nungertem kanga jangrar aser junga asayar saka tangar memeneper, anungji item asaya nungjibo mapang, rongsen aser nebu talila agüja merangdangtsü nüngdaker. Asenok dak tashimait kaji asaya nung tajung süaka achiajem nung peisasa mazüoktetba asayartem dang masü saka asaya sayurtema aika lir. Aji oda, tangar chiyongtsü tajung shitak chiajemdakja tesayur tajungi kechisüdir süaka pei asayaba asaya nung takok angutsüla ta asüba nükjidong ka yur sayua merangdaktsü, ajisüaka asenok sports school nung chiyongtsü komaka agütsü aser komaka sayur aser asayartem koba tashika bendanga agüja meranger, itemji tonga orr reprangdangnüsüka bilemer. Atangji, asayaba ya tangar den toktepa asayatsü asoshi dangbo masü saka temang anema alitsü aser medemertem den pelatepa mapang endoktsü asoshia asayar, anungji item nisungtem asoshia asayadak ki aser moapu tajung nüngdaker. Ajisüaka, state government-i asayadak ki yanglutsüba nükjidong yabo lanurtem asoshi asaya ya pei mapa küma sayia pei taküm aser kibong lidaktsünuba agi alu, gari lenmang, light, school, mozü ki aser industry-tem dang nungibö saisapong nungang temulung tagütsüba agüja inyakba angur. Jokorla, state government asoshi saisapong ya kangasa tongtibang mapa ka süra saisapong balala nung jangrartem parnok tila asüdangyongi anepalu tenzütsüa Sports Academy tajung alitsüla aser state nung lapoka aliba school ajak nung saisapong sayuba aser angazükba sentong alitsüla. Itemji ataloktsü atema tang yangluyonga aoba asayadak kitem ya tongtibang tesem asütsü aser item dak alaka ano asayadak kidangi marutettsü purtem asoshia moapu nung pei asayanü dang ayongdener asayatettsüa outdoor stadium-a peria alitsüla. Item rongnung mapa tenzüker küm 18 nunga merenemtetba Dimapur nung yanglutor akaba state stadium ya mezüng renemtsüla.

OLEMSABANG

Tesüiba Putu-i Inyaka Yutsüba lemtet tem Meputeper ya metemdanga meyiba Reprangshidangtsü koda

- T. Imti Jamir

(*Yashi adok nungi...*)

III. Special Committee November 7, 1980 meeting mena lemtoper tatembang akümbaosang Ao Arago ajak dangi yoker:

1. Meeting tenzüka Ayutemjen den sarasadem
2. Iba mangatettep nung ABAM special Committee-i lemtoper kechi terenem adoker ajitatembang tashi alitsü ta ABAM 1980 Central Council-i agütsü.
3. **Special Committee tatembang terenem o:**
- 1) Molungkimong nunger nisung 24 November 11 aser December 23 1872 baptiba anogonungi zünga arur küm 100 abensaba Baptist Arago Centenary (Nov.1972) among.
- 2) Iba 1872 küm Molungkimong nung Baptist Arago lokti tentet ka (Constituted Church)tenzükbaji timtem ka ajanga Oct 24, 1876 tamanger ajak ao masü baptiba member karbo maota ABAM aser Molungkimong joint research committee-i küm 3 research nung ngutetbaji ABAM special Committee-ia agizüker.
- 3) Molungkimong nunger nisung 24 (1872) Baptiba anogo nungi tenzüka 1919 (Repalembayimsen nungi adoka pastor inyakba küm tashi nungji Molungkimong yimdak Baptipamember metangdangi (no break) lia aru ta join Research committee-i bushitetbaji ABAM special committee-ia agizüker.
4. Anungji ABAM-i/1965 nung 'Anungji Khristan tamangba maparen (Doctrinal view) nungibaptiba anogoji Arago tenzükbaji lir ta lemtetba ama Molungkimong Baptist Arago Centenary-ji (Ao Arago Jubilee amongba yimya ama) shitak mongogo ta ABAM special committee-i iba sangdong agütsür.
5. 1872 Dekahaimong (Molungkimong) nunger nisung 24 baptia iba Yimdak Arago tentet (Constituted Church) liasü. Saka missionary den tamanger timba Yimseni oadok nung ibaconstituted church makai liasü. Saka Arago asentena aküm ta join Research-i bushitetbajishitak lir. Sarasadema Research Report aser lai den medemdanga iba mangatettep otatembang akümba ya agütsür.

IV. 1981 ABAM Council lemtet No.61

Molungyimsen Argoi kechi temolung masü arur ibaji reprangshitsü atema Special committee itemi shimer.

(1)Y. Amongba Mokokchung (2) Tsüktituba Ungma (3) Jangkidong Merangkong (4) Imnatangit Chuchu Town (5) Temjenkaba Debuia (6) Immangdangba Khar (7) Nüngashiba Longjem (8) Tongpangyuba Lirmen (9) Rev. Süpongsüba Mct. (10) Mr. Tarepyangba Longjang (11) Dr. I. Ben Wati Shillong (12) Dr. Renty Keitzar (13) Rev. Imotemjen Guwahati, 14. Tsüknungpenzü Mkg, 15. Mr. L.T. Maja Impur (Convenor)

V. 1986 ABAM Council Resolution No.40

Molungyimsen Argo-i ABAM dangi Arago otsü maparen nung temolung masüba o abenba(Ref. ABAM 1981 No.61) Mungdangi Special Committee ka shimteta toktsü. Iba committeereport 1986 küm Mungdang dangi bener aru (Committee osang)

1981-1986 ABAM special committee osang:

Okila 1981 ABAM Special Committee temalen agüja aliba ken-o atema 1981-1986 Nov. tashinung meeting 4 ben amen. Molungyimsen Argo nungia jaoka tesüiba mapang Ao Mungdang special committee balalai inyakba, Ao Mungdang Executive ajanga Mungdangi inyakba aser Missionary-temi toktsüba record bilemdanga inyakogo.

Ibai otsüren (history) asünung telemtetba, telatetba ka mesüra hau nunga o ka dangashitsü tasak aser tamakoktsü. Anungji zülua aliba kuli o (documents)-ji Committeeitebendang asütsü.

Memetetba mapang tesüiba Arago otsüren meimchir tashi mait ajanga Missionary-temnungi tenzüka Arago aser Ao Mungdang tenzüker tashi inyaka aruba mapatem nung tetidangbo tabensa mali, aji oda aibelena inyaksema ajiteta aru, tatishitsü agi 1926 Ao Jubilee amongbaji asen lima nung Arago tenzükba December 23, 1872 nung ajemdaker among masü, saka Molungyimsen akümba küm 1876 nung ajemdaker among ta ajiteter. Saka Ao Mungdang Research ajanga bushitetba agi December 23, 1872 ya-ang Ao lima aser Nagalandnung Khristar Arago tenzükbaji lir. Ibai 1960 ABAM Special Committee telemtetba nungagüja angutsü)

(*Maneni asüng adok nung...*)

Iba Olemsabang nung lemsaba ken-o aser shisatsü ya iba ocet zürlüri bilemba ken-o ama tazüngeri angateta agitsü mepishir

Atheist asoshi tasü ita nokdaker Ayaan Hirsi Ali tangbo Khristan kumogo



Ayaan Hirsi Ali

Yimpoksüi/Nov. 14, 2023 liasü. Iba sülen Muslim nungeri (Agencies): Mapang talangka azüdokshiba anema lai tasü ita Islam anema arur aser atheist asoshi tasü ita nokdaker Ayaan Hirsi Ali-i la tangbo Khristan kumogo ta tan hopta ashı.

Tanüla lenmang nung shilem ka ama aser takum ya tetetzü maka ta angateta tamangba yimsü ajak senzüka yutsüba nung telangzükba ka ama lai iba tamangba yimsü ya agizük ta ashir.

Hirsi Ali ya mapang talangka nungi Islam yimsü anemer tejangja ka lir. La lanuwa Somalia nung ali aser yangji 'female genital mutilation' timtem ajuru aser 2002 küm lai Muslim nunger tamangba yimsü yutsü aser lasasa la atheist ta sangdonga

Iliasü. Iba sülen Muslim nungeri azüdokshiba anema lai tasü ita nokdak.

British website UnHerd nung Hombarnü essay ka adoktsüba nung la küm ana dak tema atheist ama lia aruaka tangbo la Khristanpur tamangba yimsü nung züngsem ka ama züngshir, ta lai ashi.

"Atheism ajanga tongmelang tasüngdangba ka melangzütet: Takum aliba tetetzü aser nükjidong kechi?" ta lai ashi.

Tang tensa mejungi aliba bentettsü asoshi medication mesüra danga kecha bushitsü menüngdak. Khristan yimsü nung ajakji lir," ta Hirsi Ali-i iba essay nung ashi.

"Russia aser China, "global

Islamism" aser "woke ideology" densema kinük ajaklen nungi Western civilization nem timtem agütsür," ta lai ashi.

"Asenoki item timtem ya yimya tajung agi koktetsüla. Takok angutsü asoshi asenoki mitkar, rongsenketzung, tesendaktep aser technology amshir, senotsü agi alizüktsü meranger aser mesüzüksü meranger. Ajisüaka rara ajak nung asenoki tamakok ajuru," ta lai zülu.

Item timtem den takok ngua raratsü asoshi asenoki "Kechi ajanga asenok lungjemdaktsür?" ta asüngdangba langzütettsüla, ta Hirsi Ali-i ashi.

"Ni amanger, asenok asoshi telangzüba tejangjaji asenoki Khristan yimsü agizükba nung lir," ta lai ashi.

Ni mapang talangka atheist lia aru, anungji Khristan yimsü angazüksü mapang talangka agitsü, ta lai ashi.

"Ni Deobar shia sentep nung terara angazüker," ta ashi.

Alima nung nüburtem asoshi nüngdakba atema Hirsi Ali ya sempet jenti agizüka lir aser taoba mapang la Netherlands nung House of Representatives nung inyaka liasü. La ya Stanford University nung aliba Hoover Institution aser American Enterprise Institute nunga inyaka liasü.

"Russia aser China, "global

New York City nung nisung aika tekumtet angu

New York City, Yimpoksüi/Nov. 14 (Agencies): Taoba Hombarnü New York City pastor kati New York City nung aliba Times Square nung sentong tuluka ayongzüka nisung meyirijang aika adenshia tenüng sang ken aten aser timtem balala nungi tekumtet angu.

Democratic Mayor Eric Adams indang office nungi temelaba agir New York City nung aliba V1 Church nung pastor Mike Signorelli-i asendensi sentong tuluka ayongzüka liasü.

"Iba ya yimtong nung sayutsüngia nisung anir aruba kisüng masü. Onok nem temelaba agütsü. Anungi iba sentong ya temelaba agir ayongzüka lir," ta Signorelli-i CBN Digital dang ashi.

Tesüngmangtsüka nisung jenti adenshi ta sayutsüngiri ashi.

"Iba sentong ya jangratemtsüka liasü. Tatem nung ni nüburtem tanüla sempet angutsü asoshi sarasademtsüba video ka social media nung prokshiba sülen iba asendensi sentong agitsü molunget.

Iba video yagi Adams indang office den sendakteptsü maongka angu aser asendensi sentong ayongzüksü asoshi

aika tanülar sempet balala agizükogo ta ashir. New York City yimtong sünga nüburtem tanüla nung ken tena liasü, temesepba mozü achir aikati mozü toktsü, soleta asütsüpur aika athi."

Samar alirtem Yisu Khristan dangi anir arutsü asoshi nüburtem dang yimtongi aotsü melaba ya shilem tajungtiba liasü, aser iba yongji Manhattan nung nisung aikati Khristan yimsü agizük, ta pastor-i ashi.

New York City ajungalen tekumtet angur agi asüngba ngua temolung asü, ta Signorelli-i ashi.

Hamas kiralongrar-i Israel amakba sülen lendong tulu adoktsü ta Mayor Eric Adams-i tekumdangtsü ashi aser iba sülen Signorelli-i tawa video ka nung New York City asoshi sarasademtsüba video ka social media nung prokshiba sülen iba asendensi sentong agitsü molunget.

"Joko ni küsasa temang merangsar. Ni joko soleta mesüner. Asüng asoshi ni shisabolu mali, kechiaser kükak teimla lir. Tsüngremi aji ashi."

Adams indang office nungi temelaba agütsü ta sayutsüngiri ashi.

"Iba ya otsütsü sentong ka ama bilemer, kechiaser tesem ka nung iba ama nisung aika anidentsü ya kanga tasak lir. Aser iba ya ajanga America nung asendensi asoshi renema aliba ajiteter," ta Signorelli-i ashi.

Iba sentong nung adenertem aser o jembir temi takum kuli balala agütsü aser item rongnung taoba mapang arasener aliba nungi Khristan minister akumla Jenny Weaver dena liasü. Laia iba sentong nung Tsüngrem o jembia liasü.

"Yimtong nung temesepba mozü chia aliba takum nungi Pai ni anitet... Pai ni ajungket aser kinungtsü kumdaktsü, Pai ni tanur tetsü ka kumdaktsü. Pai ni Chuba indang jala kumdaktsü," ta Weaver-i lokti dang ashi.

Iba sentong ya Dicastery for Interreligious Dialogue, Catholic Bishops' Conference of Thailand, aser tanepstsü bushia mapa balala Mahachulalongkornrajavidyalaya Buddhist University lungjemer

ANOGO ABEN TSÜNGREM DEN

Tatem Maka Taküm

1 Yohan 5:13

Asenok tekümtet takümji tetenzükba temoatsü lir. Tanü Lai jagi Khrista akaba tetezü taküm akaba ta sayur, kechiaser takümji techir dak lir. Iba taküm tongtipangji tanelaren lir aser ibaji agütsü kechiaser shirnokisa amanger ajak nem Pa taküm agütsütsü asoshi Kibuba Yisu asü aser shia aru.

Tanü Lai jagi iba takümji "teti tatem makaba taküm" ta sayur. Ano o ka nung "teti tatem maka takümji" Tsüngrem maongka ta ashitsü akok. Taküm nüngdak ajakji meküta Adam dangi aor shibai pa menen asoshi tasüba timtem angu. Adam tashi meiti kuma pa shi temang asütsü tenzük. Saka asüba tetezü langzüktsü mokoki akumba masü. Iba tetezü pilaba. Asüba ajanga tanelara aser takümji shi temang nungi pilar aser temangji shizüka aor. Tanelaren asüabajia Adam temenen ajanga adok. Pai temenen mena nung Tsüngremi pa Eden nungi aridok. Nisung aser Tsüngrem pila aser Tsüngremi pa sobutsütsü asoshi temelen ka magütsü asübo Adam teti asoshi sur lila.

Teti tatem maka takümji tetenzük aser tatembang maka. Asenoki ibaji amangba second nungji agizüker kechiaser idakjisa Khrista aita alir. Melentepba ajanga asenok tasü nungi Tsüngremer taküm kadaktsür. Teti takümji tetenzük lir saka tatembang maka. Asenok temenen tatokba asoshi amangba second nungi asenok taküm alitsü tenzüker. Ozüng raksaba aser temenen ajanga asenok tasü liasü, saka Tsüngremi pei chir sempet agütsüba ajanga asenok taküm lidaktsü. Tsüngrem chir dak amangba anogo nungi teti tatem maka taküm aser teti taküm anapronglaji tenzüker.

Iba taküm tejangja alibaji lemang ana nungi jangjatsü akok. Mezüngbuba aser tongtipangtibaji Tsüngremi Pa O nung nangzükba ama tamang kateta aliba ajanga lir.

Tanabuba kuliji nisung shia taküm libaliro aser mapa, chiyongtsü jangraba, mapa inyakba, mapa inyaktsü mulungtetba aser jakla ajanga kuli sayur.

Oba, Nai Ne chir ajanga taküm agütsüba asoshi Ne tenüng asanger. Ne tenangzükbatem nung ni mulung lemtetta ali nung ni iba taküm kar ta ni metet.

Thailand nung Seventh Buddhist-Christian seminar tenzükogo Bangkok, Yimpoksüi/Nov. 14 (Agencies):

"Karun? and Agape in Dialogue for Healing a Wounded Humanity and the Earth" omen nung ajemdaker Seventh Buddhist-Christian Colloquium sentong Bangkok, Thailand nung November 13, 2023 nü tenzükogo. Iba sentong ya Bangkok nung aliba Mahachulalongkornrajavidyalaya University nung November 13-16, 2023 anogotem agitsü

akangshitsü aser alima tanepstsü angutsü asoshi arok mera agitsü jangjatsü, ta sangdong ajanga ashi.

Iba sentong nung Cambodia, Hong Kong, India, Japan, Malaysia, Mongolia, Myanmar, Singapore, Sri Lanka, South Korea, Thailand, Taiwan, aser United Kingdom densema linük balala nungi Buddhist aser Khristanpuri shilem agitsü.

Iba sentong nung shilem agirtemi alima meimba aser tanepstsü bushia mapa balala inyakba temaitsü süngtong atemtsü.

AO OSHI ANGAZÜKDAK:**TANÜ ANGAZÜKTSÜBA OJANG****Semok**

(v) Sobusolemtsü asema (put on garments)

* Pa tola tasen ka semoker sentepi oa nguogo.

Semoksü

(n) asenoki asema süoshitem (garments)

* Joko temekong mapang arurji semoksü talem nüngdaker.

OLONG PAITEP # 6616

1		2		3		4	
		5		6		7	
8							
		9					
10							
						11	12
		13			14		
15			16				

TIPLÉN

- | | | | |
|---|-------|-----------------------------|-------|
| 1. Anenzükda ki | - (5) | 1. Reprangdaktsü | - (4) |
| 3. Asür mangyimba | - (5) | 2. ____ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ____ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ____ a | - (3) | 9. Küm kasa purtem | - (5) |
| 13. Ajungbenia temulungjang tongtonglatsü atu | - (5) | 10. Tetsüng tajemeldak | - (6) |
| 15. Tejen lai nung tesayur | - (5) | 12. ____ adenshi | - (4) |
| 16. Tsüngsak-mopung | - (5) | 14. Tsünüsénbongtsü adokdak | - (3) |

LANGTSÜNGLEN

TIPLÉN :	LANGTSÜNGLEN :
1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Sura.	1. Khu, 2. Sujak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

OLONG PAITEP # 6615 TELANGZÜBA**TIPLÉN :**

1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem,
25. Sura.

LANGTSÜNGLEN :

1. Khu, 2. Sujak, 3. Onük,
4. Oba, 5. Anü, 6. Ratet,
7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü,
19. Taju, 21. Ano, 22. Onü,
23. Kua.



November 17, 2023 nungi Shillong Cherry Blossom Festival 2023 tenzüksü atema sentong renemogo. Takum benjung mezüng anogo kenten sentong nung Sanam, Hybrid Theory, SUR, Kenny Musik, 4th Element, The Band Phantasm, DBRYN, Gwyneth, Dalariti, CYCO, Aminio, Dr. Legend aser Chevinia ajanga shilem agitsü. Maneni tanabuba nung NE-YO, alongside Meba Ofilia, Pink Panda, Snow White, Rahul Rajkhowa, Street Stories – Banjop, Empirical Tribe – Tenny, Zethan, Ricaa Stella aser Bunker Kharkongor ajanga shilem agitsü. Benjung tembangba anogo nung Boyzone vocalist Ronan Keating, Jonas Blue, Lou Majaw, Blue Temptation, Da Minot, Nokpante, Rhem, Favian, Wanjop Sohkhlet, Banrap, Youngg Nate, Meban, Lamphrang, aser Toshan nungeri shilem agitsü. Iba benjung nung anogoshia nisung 30,000 arutsü imlar ta Tourism Minister Paul Lyngdoh-i ashi.

Assam sorkari contractual teachers 40,000 regularise asütsü**Guwahati, November 14, Pegu-i ashi.****2023 (Agencies):** Assam sorkari sorkar school tesayur 40,000 jungnua regularise asütsü lemtetogo. Parnok ya tanga contractual basis nung inyaker.

"TET-qualified teachers 25,000 tema lir aser parnok ya primary schools balala nung contract basis nung inyaker. Maneni primary schools nung contractual teachers 9,500 lir" ta Education Minister Ranjan

Pegu-i ashi.

Maneni item tesayur 4,500-i class 9 aser 10 agir aser onoki parnok ajak regular appointment asütsü lemtetogo, ta pai ashi.

Takum Independence Day onük jembidang Chief Minister Himanta Biswa Sarma-i tesayur 40,000 tashi state sorkari regularise asütsü sentong aliba shia liasü.

"Chief Minister-i sangdong agütsüba ama Education department-i meranga inyakogo

aser tesayur 40,000 regularise asütsü. Iba mapa ya sangkum March ita tashi nung tembangtsü" ta Minister Peguisa ashi.

Contractual teachers indang service mapa mereprangsü aser parnok tasen shimoker ama asütsü ta paisa ashi.

Tesayur 40,00 ya contract basis nung inyaker saka parnok nem permanent teachers ama regular pay agütsür, ta paisa shisem.

BJP züngsem Rajkumar Brahma-i BPF nung aden**Guwahati, November 14, 2023****(Agencies):** Bharatiya Janata Party (BJP) nung taoba Kokrajhar district president aser executive member Rajkumar Brahma-i Bodoland People's Front (BPF) nung denogo.

Brahma den külemei taoba BJP züngsem pezüi BPF nung aden. Kokrajhar nung sentong ka agidang parnok BPF züngsem aküm aser parnok ya Biplab Debnath, Bijoy Kumar Saha, Naboranjan Barman aser Chandan Tarpadar nunger lir.

Iba sentong nung BPF tanishir Hagrama Mohilary aden.

BPF züngsem aikati kobi melii BPF nung adentsü. BTR nung BPF

jenjang kanga majung lir aser BJP-i ni anema mapa inyakba assoshi ni toktsü, ta Brahma-i ashi.

"BTR nung BPF dak tamang maka kümogo. BJP ya inyakyim mesüra tetuyuba kecha mali inyaksangshir. Ni executive member inyaktsü atema ano ita pezü anünga liasü. Ni president dang kü mapa tembangdakjang ta mepishir saka pai ibaji manga. Tasa ka ajanga pai iba lemtet agiba atema ni temulung yiru aser tanü ni BPF nung denogo" ta paisa ashi.

BJP aser parnok den yariteper UPPL züngsem aikati BPF nung adentsü mulunger. Party shingaia onok den lokteptsü asüngdanga mali aser onok kija ser tokteptsü, Hagrama Mohilary-isa ashi.

MYKIFEST-**CUM-HORNBILL FESTIVAL, 2023****DANCE COMPETITION FOR WOMEN****(AGE: 18 yrs & above)****Venue: Hortiscape, Kisama****Audition : 8th Dec. 2023 (12 Noon Onwards)****Finals : 9th Dec. 2023 (3:00 pm Onwards)****CATEGORIES:****Solo - Open****Group (5-10 members) - Open****PRIZES****Solo**

- 1st Prize** : Rs. 15,000
2nd Prize : Rs. 10,000
3rd Prize : Rs. 7,000

Group

- 1st Prize** : Rs. 30,000
2nd Prize : Rs. 20,000
3rd Prize : Rs. 15,000



organized by
Department of Women Resource Development
Government of Nagaland

Interested Candidates/Parties may submit written applications to the Director, WRD latest by 30th November, 2023 or through email at womenresourcedev@gmail.com

Myanmar kübok India den arrtsü nung raratep tali kümogo

Yangon, Yimpoksü/ November 14 (Agencies): Myanmar nung civilian yimsüba tanaben amenokshitsü atema raraba teloktem Linük northwest len India den arrtsü nung military anema inyaksangshiba tali kümogo.

Hombarnü ghonda aika raratepba sülen Chin state nung item teloktem yagi India kübok Mizoram den arrtsü nung amenoka aliba military outposts ana tashi azüokogo, ta local media sangdong balala ajanga metedaktsü.

Kidanger Rakhine state aser northern Shan state nung takok anguba sülen tang iba tesem nunga takok ngutetogo. Hopta ana tejakdang nungi coupe anemba teloktem kanga junga sendakteper inyaksangshi tenzükogo.

Senior General Min Aung Hlaing-i anir military-i 2021 küm civilian sorkar atsüngtokba sülen Myanmar mepetmesü tului ai. Iba ajanga nüburtemi longkak ait tenzük aser military-i parnok anemertem tashiyim amshia azüoktsü tenzükba sülen item teloktem yagi prangbong hadir bener military anema nokdak tenzük.

Hombar anepdang yakta coup anemba teloktem nungi sepi 80 shi-i Rikhawdar aser Khawmawi military camp amak tenzük aser ghonda aika raratepba sülen outpost

anaprongla azüokogo, ta Chin National Front (CNF) Vice Chairman Sui Khar-i Reuters news agency dang ashi.

Tang CNF-i, India-Myanmar arrtsü nung tesem ajak azüoktsü merangtsü, kong ano Myanmar military indang camp ana tashi lir, ta paisa shisem.

"Onok tejakdangi odar," ta Sui Khar-i ashi. "Onok nükjidongji yimtsüng nungi jila balala aser iba nungi linük yimtiba atongtsü asoshi lit."

General shirnoki parnok yimsütsü asoshi tetsüdkaktsü aika adokba indang agizükogo parnoki linük nung mepetmesü tali küma aoba mapang linük kübok ano tesem aika nung martial law benokogo.

Social media post balala ajanga ashiba agi, Rakhine state yimtiba Sittwe nung aonung curfew benokogo. Osang kar ajangabo state yimtiba yimtong nung tank dena senzüba indang metedaktsüogo.

"Onoki jila nung tank tem senzüba nguogo. Tanübo dokan aika shibanger lir," ta jila nung alir kati Reuters dang ashi.

Rakhine nung alir ana aser Arakan Army (AA) otongdar kati state kübok tesem balala nung raratepba indang metedaktsüogo. Arakan Army ya nüjiso asoshi raraba telok ka lir aser parnoki Rathedaung aser Minbya jila nung military post tem atsüngogo.

Rathedaung nung alir kati Reuters dang Mongolbarnü ashiba agi, iba tesem manger mesangwa tsüngda artillery amshia makogo aser military jila telungi aitogo.

"Yasüng jila nung lendi ka nung artillery tsüka liasü. Iba lendong nung nisung astüba mesüra yiruba indang osang kecha mali," ta jila nung alisang yagi ashi.

"Nüburtem jila toktsür jena ao tenzükogo aser sepaitem jila telungi aitogo."

Kin o kin na tsüngda mangatetlep adokba aser 2017 küm military-i Muslim Rohingya atsüngtoktsü meranga mepetmesü tulu adokaka coup sülen Rakhine state nung mepetmesü aikabo madoki liasü, koba coup masü tsüngda AA aser military na tsüngda ceasefire asoshi mulungteper aliba ajanga liasü.

Ajisüaka ceasefire benoker aliba ya 2021 küm November ita nungi raksa ao aser AA-i state azüokatok.

AA ya Myanmar kübok autonomy atema 2009 küm amenok aser parnok rongnung timba ethnic Rakhine Buddhists nungerem lir. Iba state nung ya nüburtem timba Buddhists tamangba yimsü dak amangertem lir.

Maneni linük nung tanga telungpur teloktem aika military den küm aika rara aradar.

Mulungnen O



Asür T. Nungsangtemjen (Waromung)

Onoki teti meima aliba **Obala T. Nungsangtemjen**, shirangba mapang nungi tenzüka tasüba anogo (November 1, 2023) tashi onok mangyim jashi aser mulung zürep tia nung alidang, kija, lokti balala, tembartem aser yimeryimsangertem ana aser talang nungi shirnokisa sarasadem den, nübu, rongsen aser shisatsü agi yariogo, nenok ajak dang ozü kinungertemi temulung tarotkiba nungi kanga pelar.

Iba den külemi item lokti balala metetshii melitet nung parnok dang pelaba lemsateper: CIHSP (Referral) Hospital, Dimapur nung Doctors & Nurses, Padumphukuri Ao Baptist Arogo, Dobashis' Mokokchung town, Waromung Village Council, Ao Baptist Arogo Mungdang (ABAM), International Evangelistic Fellowship (IEF), Clark Theological College (CTC) Trinity Theological College (TTC), Longpok Holdings, Lim arogotem, Yimpeni Students Union, Waromung Compound Sector aser Waromung Compound Baptist Arogo.

Onoki tsüngdong maruteter saka iba osang kaket ajanga nenok ajak dang pelaba lemsateper. Nenok dak aria bilemba temeim mapa tulu ya ozü kodanga mamadoktsü. Nenok mapa tajung asoshi tematiba Tsüngremi talubosa moajangma.

~ Chirnur, Semchir, Tetsütamo, Anükapang & Kinungertem.

Taoba Pakistan PM Imran Khan ano ken o danga nung apu



corruption office temabai puogo.

Accountability court judge kati pa aputsü temelaba agüja Adiala Jail superintendent dang merenshitsu totuyuba agütsüba sülen Khan ya National Accountability Bureau (NAB) ajanga Hombarü apu, ta Dawn osangkaket ajanga ashi.

Rawalpindi nung aliba Adiala Jail superintendent ajanga NAB team kati Hombarü apuba mapang Al-Qadir Trust case nung pa apur. Iba arrest warrants mapa kuma inyakba tetetzü Pakistan Tehreek-e-Insaf (PTI) tekolahba Khan ya

Toshakhana, Al-Qadir ken o tem nunga apuba lir. Court of law ajanga pa meshizükba sülen jail nung NAB team ajanga asüngdangya asütsü.

Arishi küm 71 tain cricket asaya aliba nungi yimten yimsüsür akumsang ya August ita apuba sülen cipher ken o dak sendakba nung Adiala Jail nung yua lir.

Ali-Qadir Trust ken o ya Pakistani property tycoon ka ket nungi ngutetba sen 190 million pounds UK indang National Crime Agency ajanga Pakistan dangi yokba dak sendakba nung lir.

Iba mapang Khan ya ato kilonser liasü, aser iba sen ya linük indang senpong nung inoktsü melena küm ishika tejakdang Supreme Court ajanga senchi sen Rs 450 billion achiba menoktsü asoshi shishilempar nem amshidaktsü.

Pakistan nung osangtem ajanga ashiba agi, iba teyari melen shishilempari Punjab kübok Jhelum district nung Sohawa tesem nung Al-Qadir University amenoktsü asoshi Khan aser pa kinungtsü Bushra Bibi nati amenokba trust ka nem sempet ama ali acres 57 shi agütsü.

Hombarü ken o jembidang obendangeri NAB prosecutor dang ken o ana nung Khan-i bail petitions agüja aliba asüngdanga liasü, koba Islamabad High Court nung anendaka lir aser tang tashi totuyuba balaka agüja mali, ta NAB prosecutor-i langzü.

Toshakhana gift case nung Pakistan court-i Khan aputsü totuyuba agüja lir, koba August ita aija apuba ken o den balala.

Iba ken o ya Election Commission of Pakistan ajanga benok aser ibai Toshakhana nungi pa nem sempet agütsüba pai ayokba miimshiba indang lir.

NATIONAL HEALTH MISSION
DEPARTMENT OF HEALTH & FAMILY WELFARE
GOVERNMENT OF NAGALAND

National Newborn Week

15TH - 21ST NOVEMBER 2023

"NURTURING NEWBORN LIVES THROUGH COMMUNITY - FACILITY ENGAGEMENT"

FOLLOW US @nhmnagaland X @NagalandNhm

FOR MORE INFORMATION CONTACT
THE Chief Medical Officer's Office/ Nearest Health Center.

- 01 Mozuki nung tanur soa anepaluba ajanga takum kumzüker.
- 02 Tanur aintsü asoshi nüburtem aser facility tesendaktep.
- 03 Facility level: Specialised care nüngdaka aliba kinü tanur asoshi Special Newborn Care Unit (SNCU) aser New Born Stabilization Units (NBSUs).
- 04 Community level: Home Based Newborn Care - tetsü aser tanur anepalutsü aser yaritsü atema ASHA ajanga ki sema jajar.
- 05 Kangaroo Mother Care: anojungi asoba kinü tanur tetsüi anepalur ama talem, mamatzü, tashidak nungi kumzükba, mimshija, kumzüka aser meima amshiang.



4buba Autumn Huddle tanü nungi asayatsü

Dimapur, Yimpoksüi/ November 14 (TYO): Ao Kaketshir Telongjem Dimapur-i ayongzükba official saisapong aser Athletics tetoktepba; 4buba Autumn Huddle November 15 aser 16 nü Government Higher Secondary School ground, Nagarjan nung asayatsü.

M o n g o l b a r n ü osangbenertem den sensaksema mapang ASUD tir Imnatemsu Pongen-i ashiba agi, küm ana nung khen asayaba asayamung nung team 8-i shilem agitsü kong Aoer yimtsüng ajak nungi kaketshirtem lokti tentettem aser Ao Kaketshir Telongjem Dimapur nung züngoksema aliba sub-unit ajak densema lir. Asayamung nung Volleyball, football, athletics aser arr atsütepba asayatem asayaba angutsü.

Asayamung nung shilem agitsü aliba team tem yamai alitsü :

The teams are Sungkong Bangers (Chuchuyimlang, Soyim, Lirmen, Kupza, Chungtiyimsen, Aoyim)

Arju Dwellers (Mangmetong, Akhoya, Molungyimsen, Mongchen, Chungliyimsen, Japu, Diphupar)

Tenum Flyers (Mopungchuket, Khensa, Yaongyimsen, Yimjenkimong,

Lakhuni, Padampukhuri) Tzula Warriors (Mongsenyimti), Chungtia, Asangma, Longkhum, Longkong, Anaki, Unity village) Meinkong Woodlands (Süngratsü, Longmisa, Dibua, Changdang, Kelingmen, Chami, Changki, Naga Un)

Milak Rapids (Longjang, Merangkong, Aliba, Unger, Mokokchung yim, Aonokpu, Diphupar B)

Tsürang Giants (Changtongya, Warumong, Chuchuyimpang, Moayimti, Longpa, Nokpu, Aoyimti)

Menung Tigers (Khar, Kangtsung, Longsa, Molungkimong, Mekuli, Longjemdang, Aoyimkum)

Kasa mapang nung convener, Ricky Ozukum-i

ashiba agi, asayamung nung shilem ka ama parnokisa "ASEMANG" ta nüngja agütsür mezüngbuba Dimapur Marathon November 25 nü ayongzüka asemteptsü. Iba amala asayamung ya tang mezüngbuba Nagaland nung

ayongzüka asayatsüba lir aser linük kübok tesem balala nungi asemteperteemi shilem agiba angutsü.

Tetsür aser tebur naprongla atema half marathon ya km 21.097 asütsü aser ano tetsür

aser tebur naprongla atema 10 km Red Ribbon Run ka asemstsü.

Iba asemtepba ya November 25 nü anepdang 5 ako nung tenzüksü aser 8:00 ako nung tembangstsü.

Iba asemtepba ya Dimapur Stadium nung tenzüksü aser iba sülen City tower - Burma camp - Purana bazaar - 3 mile-Nagarjan junction - Holy Cross junction- City tower ajangaer Dimapur Stadium nungsa tembangstsü.

10k red ribbon run ya-a Dimapur Stadium nung tenzüksü aser iba sülen City tower - Burma camp - Super market - Deluxe point - Holy cross junction -City tower ajanger Dimapur Stadium nung tembangstsü.

Asayamung nung senpet balala yamai agütsütsü:

Fastest runner- Rs, 1,00,000 (tetsür aser tebur)

2nd Place- Rs. 50,000 (tetsür aser tebur)

3rd place- Rs, 20,000 (tetsür aser tebur)

10k Red Ribbon Run

Fastest- Rs. 25,000 (tetsür aser tebur)

2nd place- Rs. 15,000 (tetsür aser tebur)

3rd place- 10,000 (tetsür aser tebur).

Uttam lenisüba nung India team Men's Junior World Cup asayatsü



Yimpoksüi/November 14, 2023 (Agencies): Forward Uttam Singh lenisüba nung India team FIH Hockey Men's Junior World Cup asayatsü, koba Kuala Lumpur nung December 5 nungi 16 tashi asayatsü.

India team-i tesüsabuba Asian champions koker lir aser iba asayamung nung parnok Pool C nung Canada, South Korea aser Spain den ata lir. Parnok mezüngbuba December 5 nü Korea den asayatsü.

Iba sülen India team December 7 nü Spain den aser December 9 nü Canada den asayatsü.

Iba asayamung taoba edition nung India team pezübuba nung tembanga liasü aser coach C.R. Kumar-i ashiba agi, taküm iba

"Onok team kanga junga lir. 2016 Junior World Cup akokba team-i onok ajungmesor. Team nung asayar tejentem lir shirnok Bhubaneswar nung asayaba taoba Junior World Cup nunga asayaogo.

"Parnok lenisüba nung team asayatsü aser parnoki teammate tem dang len sayutsü. Onok nükjidongji Junior World Cup akoktsü asoshi lir aser iba atema bendanga agüja inyakdar," ta Kumar-i ash.

Pool A nung defending champions Argentina, Australia, Chile, aser Malaysia lir, Pool B nung Egypt, France, Germany aser South Africa aser Pool D nung Belgium, Netherlands,

New Zealand, aser Pakistan lir.

India team yamai alitsü: Goalkeepers: Mohit HS, Ranvijay Singh Yadav.

Defenders: Shardanand Tiwari, Amandeep Lakra, Rohit, Sunil JoJo, Amir Ali.

Midfielders: Vishnukant Singh, Poovanna C B, Rajinder Singh, Amandeep, Aditya Singh.

Forwards: Uttam Singh (Captain), Aditya Lalage, Aranjeet Singh Hundal (vice-captain), Sourabh Anand Kushwaha, Sudeep Chirmako, Boby Singh Dhami.

Reserve players: Sukhvinder, Sunit Lakra.

Women's U15 ODI Trophy atema Nagaland team sangdongogo

Dimapur, Yimpoksüi/ November 14 (TYO): Nagaland Cricket Association-i Mongolbarnü Kolkata nung asayatsü aliba Women's U15 One Day Trophy 2023-24 atema asayartem sangdongogo.

Team nung asayartem

yamai alitsü:

Najmeen Khatun (C)

Mhasekhulu Vadeo

Eleena Kaurinta

Bethel Jumei

B Mpimei Phom

Jannat Khatoon

Sophia Parveen

Chubamenla

Vituonuo Dzeyie

Nukshinaro Jamir

Seno

Tinggeuchile

Support Staffs:

1. Limatenzük Amer - Team manager
2. Talikaba - Head coach
3. Lanumongla Jamir - S&C coach
4. Vitsomenu Sezo - Physio

Fisture:

17th Nov. 2023: Nagaland vs J&K

19th Nov. 2023: Nagaland vs Karnataka

21st Nov. 2023: Nagaland vs Meghayala

23rd Nov. 2023: Nagaland vs Assam

25th Nov. 2023: Nagaland vs Delhi.

Morne Morkel-i Pakistan bowling coach mapa toktsüogo



Yimpoksüi/November 14, 2023 (Agencies): Taoba

"Pakistan Cricket board-i pa mapang South Africa nunger pacer Morne Morkel-i Hombarnü Pakistan cricket team bowling coach mapa toktsüogo. Pakistan team World Cup nungi tsükba sülen anogo ana dang lir pai mapa toktsüogo.

Babar Azam-i aniba team ya taküm World Cup nung junga masayateti asaya teku nungi pongu nung tamakok ngua liasü. Parnok tatembangbuba asaya nung England team-i run 93 agi koka liasü.

Morkel ya IPL club Lucknow Super Giants nung inyakba sülen taküm June nung ita trok atema Pak team nung aden.

Pa Pak team nung adenba sülen Sri Lanka den mezüng

Pakistan team pongububa nung tembangba sülen semifinal atema qualify mesütet aser iba ajanga taoba

mapang asayartem team nung temelensi atema takhangba agüja arudar, kong Babar Azam ket nungi captain mapa agintsüba dena densema lir.

Iba asayamung nung Pakistan team India, Australia, South Africa, England den tamakok angu aser parnoki Afghanistan-a mekoki liasü.

Modi aser Shan nati sorkar auya... (Tapak 3 nungi...)

Iba sülen BJP lenir Modi, Shivraj Singh Chouhan aser Amit Shah nungeri MLA tem alizük aser Madhya Pradesh indang sorkar auya liasü," ta pai Madhya Pradesh kübok Vidisha nung nüboyimba sentong ka nung jembiba mapang ashi.

"Sen crore aika agüja Congress MLA tem aliba ajanga nenok telemtetba, nenok ola aser nenok mulungjang BJP lenirtemi aser Ato Kilonser-i ajasatsüogo. Nenok ashioktsüogo," ta pai ashi.

Gandhi-isa, Congress-i Dukan' lapokogo. Onok non-violence sepaitem lir. Ajisüaka onoki parnok temeim agi masü. Onoki 'Nafrat ka Bazaar' nung 'Mohabbat ki

Madhya Pradesh nung menden 145 nungi 150

tsüngda akoktsü ta shiogo.

BILEMDANGANG

"Mapa koba südir süaka nendaka inyakra idakji temaotsü lir."